

雙魚草堂詩鈔

丁丑荷月

雙魚草堂詩集

實名友題

雙魚草堂詩集勘誤表

頁數	行數	字數	校正	頁數	行數	字數	校正	頁數	行數	字數	校正
第七頁	第七行	第三十	邵誤爲郡	又	第四行	第二十	染誤爲塵	又	第六行	第卅九	接誤爲樓
又	第三行	第三十	履誤爲履	又	第十一行	第十一	先誤爲兇	又	第七行	第十四	宮誤爲富
第八頁	第十行	第九字	練誤爲緣	第二十頁	第三行	第三十	如字多排	第廿三頁	第三行	第五字	寐誤爲寂
第十一頁	第二行	第十五	策誤爲榮	又	第八行	第五六	仁壽山誤爲扣山壽	又	第五行	第九字	懣誤爲懣
又	第一行	十五六	爲千里送誤爲千里送	又	第十一行	第二十	迴誤爲迴	又	第十一行	第二十	雪誤爲雲
第十二頁	第六行	第三十	瞻誤爲瞻	第二十頁	第二行	第三十	圖空費誤爲費圖空	又	第三行	第十二	里誤爲重
第十四頁	第五行	第十一	在誤爲在	又	第三行	第十三	屬誤爲屬	又	第八行	第四字	燭誤爲燭
又	第四行	第九字	暗誤爲晴	又	第二行	第一字	山誤爲外	又	第十行	第七字	戎誤爲戎
第十七頁	第五行	第二十	投誤爲授	第廿二頁	第六行	第九字	黍誤爲黍	又	第七行	第七八	與經齊誤爲經與濟
又	第三行	第二十	至誤爲主	又	又	第十六	弧誤爲弧				
第十八頁	第一行	第二十	費誤爲貫	又	第二行	第十八	堪誤爲堪				

備考

重陽登樂都東城詩是五律二首 塞上雜吟是八首 贈四子王詩是二首 四子部落道中詩 感懷詩
 吟菊詩均是各四首 中秋從敦都起程詩是七排一首

序一

受業李煥章敬撰

我滄至前清末葉士尙浮華人鮮實學青年學子埋首芸窗所鑽研講求者制藝試帖已耳至於典墳索邱概束高閣間有致力於經史根柢之學者則羣相非笑之以爲迂習尙所煽流爲空疎卽區區之詞章亦有每況愈下之勢我敬輿先生崛起滄庠隱痛時弊慨然以振靡式浮爲己任於是心醉六經胸羅諸史其辛勤績學同時輩流中更無出其右者以故發爲文章欸唾成珠琳琅滿紙每一脫稿士林以爭觀爲快迨通籍後周遊京外歷交當世碩彥名流嗣且馳驅戎馬遊覽名山大川學識益加精邃著作益加宏富蓋不僅聲律駢儷之藝足以傳世已也顧其秉心謙抑雖文章詩稿積成卷軸初未嘗輕以示人刻距先生捐館業閱十有六年於茲矣其令倩裕君寶峯執其雙魚書屋詩草徵序將以刊行余披覽一過其古風鬯茂淵懿入雅出風其近體俊逸清新較唐轍宋蓋先生讀萬卷書行萬里路本鑄史鏘經之手作敲金戛玉之聲所謂腹有詩書氣自華良非誣也今芳徽雖渺而讀其遺詩正如管中窺豹於當日文采風流亦足略見一斑自慚謏陋無文曷敢以序先生之詩惟昔年謬蒙耳提久沐春風化雨今日欣晤手澤儼同片羽吉光因弁芻言聊伸葵向時共和八晬歲在己未清和節次日也

序二

受業徐昶謹撰

讀清初六家詩鈔知盛世元音直足追中唐而邁北宋自海禁大開外患日棘憤世憂時之士發爲詩往

往變爲激楚之音蓋詩所以寫性情忻戚悲愉性情與世推移詩歌亦因之各異二南變爲小雅其以此乎吾甯鄉土志所載詩詞多出自異邦仕宦求之鄉先生中寥寥如晨星焉敬輿先生稽古功深學識淵博著有文集詩藁和素耳其名而以未得捧讀爲憾已未首夏裕君寶峰持雙魚草堂詩集徵序於余留之案頭公餘課暇迴環朗誦悉其格律之謹嚴詞意之雅健因嘆先正典型于斯未墜先生生當晚清其熱忱毅力雅欲挽末流振頹風故一種抗塵走俗之概時流露於字裏行間今謝世已十餘年矣而讀其詩集當年言論丰采猶於簡編間髣髴遇之頃閱報章悉大總統特令海內徵求清代詩集足見尙古右文之至意寧邑人士擬刷印成帙與李和菴張慎齋兩先生雙榆鴻雪諸詩集同貢中央實不朽之盛事嗚乎名山事業與竹帛勳名同垂千古歷覽全渾人物志中公巨卿雖不乏人而求其文武兼資著作名世更無出先生右者和素蒙青睞誼不容辭聊叙蕪詞以表崇拜之忱云

序二

門生王育德謹撰於新柳村之松月草堂

光緒辛丑春育德始受業於張子訓夫子夫子敬輿先生高足弟子也時先生致仕回里暇則輒臨學會與夫子縱談古今討論諸家文詩集育德始年十六七從傍竊聽如臨高山大川而莫知涯涘也如入山陰道中而應接不暇也如遊東西洋諸大埠而瓌貨山積也退輒與同舍生肖其狀以爲戲癸卯甲辰夫子赴汴會試延先生代館授課餘暇卽授詩法光風霽月獲益殊匪淺鮮育德故不善詩嘗漫詠之以自

娛間出一二同人俱許以爲能夫以育德之孤陋略得先生緒餘僉謂可與言詩則先生之詩可知矣夫詩原本性情道存忠孝先生事親至孝大本已端卽已掇進士巍科保監司大員使假以斧柯其忠君愛國之忱發爲偉績殊勳足以震當時而傳後世而天偏勒之未能得展布一二而僅以詩傳可惜孰甚焉猶幸文齋輝菴香齋諸前輩較刊遺集傳諸不朽讀之雄健奇警奪人目光白香山稱劉夢得詩云是集所在必有鬼神阿護吾謂是詩亦然今距先生之歿十五六年矣每一展卷猶髣髴風朝雨夕在學舍口講指畫時也

序四

受業祁中道敬撰

自共和告成海內教育名家皆以保存國粹爲前提於是學校學科注重國文所選課本於古文之外兼選詩歌而音樂中亦間用古譜藉以發舒固有之精神而輔助新思想也吾甯僻處邊方開化較遲明季建置略有規模至清代中葉始稱文物之區然囿於科舉之制士君子才力聰明莫不消耗於八股試帖之中求一傳世文字直如鳳毛麟角如敬輿先生以進士供職京師交游大雅碩彥迨服官三晉駐軍薊燕閱歷數十年足跡半天下奇聞壯觀羅胸填臆故其爲詩也落落英英飄洒俊逸有晉魏六朝遺風眼光心思高人一等非株守鄉井尋章擇句之小儒所能望其項背道生也晚忝列弟子之末而朝夕親炙數歷寒暑先生之勤儉持躬與夫手不停披口不絕吟皆所親見而心焉慕之者噫哲人往矣而遺藁猶

存追憶受業時情況歷歷如昨又令人不忍卒讀而中心是悼也謹序

題雙魚草堂詩集 七律二首

門生基生蘭沐手謹題

香齋漫吟

不僅文章見性天先生詩意更超然萱堂戲綵娛慈母槐市談經紹昔賢識破宦情胸有竹學成書法筆如椽宏功況且垂桑梓載道口碑百世傳 先生文學冠渥中詩筆清新句更工一卷菁華成白雪滿城桃李仰春風才如王孟性靈現書仿蘇黃腕力雄我亦當年門下士不妨小技獻雕蟲

題雙魚草堂詩集

仿蔣心餘題袁隨園詩集體一首

受業張明遵沐手謹題

先生學行一世師由初迄終毫無疵少年曾下董生帷潛心大業園不窺近自咸同遠軒義博古通今衆口推手握江郎筆一枝龍虎榜上姓名垂官授戶部湖廣司閩文介公素深知特章保送小軍機先生頭掉不肯爲八旬老母尙在斯溫清定省愼其儀臨喪儼然孺慕悲道旁觀者皆歎歎身佐戎幕定西陲馬步全軍聽指揮直道不行時事非兩袖清風飄然歸素行淡泊日掩扉經史子集手重披官府禮聘豈能辭成德達材兩及時虎皮講易坐臯比所培桃李悉成圍久侍函丈親芳徽諄諄時教聖賢希健於文章工於詩遺編印成皆珠璣清詞麗句沁心脾精深華妙世間稀我誦萬徧竟忘疲護世誠中思朶頤九原可作執鞭隨未知衣鉢果傳誰

題雙魚草堂詩集

渥中後學馬玉堂敬題

夫子西平一名儒經綸滿腹唾成珠昔日曾知農部事大名鼎鼎布燕都未及瓜代還梓里免去慈親門
閭倚心存至孝棄簪纓何人奉親能若此五峰主講已多年迄今文明世代傳培養人才興孔道邊陲徧
頌學淵淵萱堂百歲後旋京跋涉長途沙漠行到處吟懷成錦句雙魚詩草述平生抵都後分太原省統
帶晉軍爲首領祇緣看破宦場艱解組還鄉訪佳境一觴一詠敘天倫杖履逍遙見性真臨流賦詩何瀟
灑飄然半世自在身予也自恨生實晚未獲親炙已數載終日偷閒便讀書以助吟哦增文彩我今恭讀
夫子詩久慕瑤章得見之勉湊俚言附驥尾自媿才乏葛氏詞

題雙魚草堂詩集

關寄玉蝴蝶

嚴陵余人題

十六春秋青海。文徵獻訪。古話今評。說有來翁。謫從碧落奎精。掌絲綸蓮燭篋滿。醉金馬
木署題名。贊元戎箭穿山石。檄討邊庭。時平繡衣驟脫。黃冠修史。白鹿傳經。著述千篇。
時緣陽九未殺青。只詩卷神閑韻雅。兼唐宋骨峭風清。校昌黎喜逢李漢。纂集零丁。

雙魚草堂詩鈔目錄

五言古風五首

五言律詩四十五首

五言絕句十七首

五言排律四首

七言古風九首

七言律詩七十七首

七言絕句七十四首

四言詩一首

詞二闕

雙魚草堂詩鈔

鄉試路過小關山宿馬路坡七絕四首

峯自嵯峨水自潺，樓巖竹屋兩三間。
漫言山客無佳趣，靜得青山世外閒。
蒼蒼烟樹等雲平，萬壑風生飛瀑聲。
鳥道千盤峯四面，往來人在畫中行。
怪石粼粼當道橫，琪花瑤草不知名。
行人莫道登途苦，世路崎嶇總不平。
萬綠叢中得暫留，如雲秋稼滿平疇。
曉行唯怯征衣冷，越盡關山路更悠。

過隴州感懷

近郭垂楊綠萬行，水田風送稻花香。
前途問有路多少，一片蟬聲送夕陽。

過岐山舊治

王化當年播頌聲，而今不見鳳來鳴。
道傍多少殘碑在，遺蹟模糊字不明。

庚午鄉試在場口占

號舍相連人語歇，風簷麟次隔朱欄。
諸君習屈休嫌護，廣廈從今庇士寒。

朝陽宋氏廢園中牡丹

任他桃李鬪春華國色從來冠衆葩若使此花誇富貴不應生在野人家

感懷集劍南詩鈔 七首

屋老霜寒睡不成半甌綠酒萬緣輕孤窗聽雨常終夜尙勝聞雞賦早行
秋夜挑燈讀楚詞一生虛作虎頭癡功名本是無憑事旋了生涯一首詩
一柱清香晝掩門人間隨處有桃源舊書細讀猶多味世事紛紛不足論
病骨支離又過秋開編時與古人遊自憐未廢詩書業月落長歌起飯牛
征塵十載暗戎衣誰與愁城略解圍欲疏萬言投魏闕壯心雖在事多違
秋風空羨下鞦韆一念軒裳實未曾珍重從今常倚壁閉門養此老無能
一窗昏曉送流年萬事元知合付天安得此身無一事孤桐三尺寫秋泉

鳳山書院秋夜

欲擊中流楫終宵且枕戈檢書防走蠹撲燄救飛蛾
夜靜河聲遠窗虛月色多壯懷無限意扣角效牛歌

暮春感懷

愛惜春華努力難空教春去勉加餐閒中歲月同梭擲靜裏煙雲着意看幸有韋絃爲法語莫將詞句了

儒冠讀書所學緣何事爾室獨居敢自寬

輓曹楊二君七律二首

虎穴誰能並轡行須憑舌戰解刀兵不聞將帥紅旗報惟見書生碧血傾以道殉身全大節舍生成義仰
堅貞馨香俎豆昭千古泉下應知恨亦平

十三村堡久聯營倡義惟君苦練兵不忍衆人甘敗死何期一己竟捐生殺身能解嬰城厄旌節常留歿
世名渺渺英魂何處是欲追芳躅淚先傾
投筆當年赴柳營孤身奉命質番兵文章報國徒有志桑梓臨危不顧生自古丈夫皆得死從今草野亦
知名君留多少傷心事都付疆場馬革傾

五峯書院落成謹步豫都護夫子元韻四章恭呈張价翁觀察

留侯勳業紀旂常位望於今勝玉堂良史折衷編郡牒元符在握燦天章憐才何止分清俸釋奠欣瞻肅
大房布化期年興百廢先教蠶序起輝光
曾將三字肅官常黻纈衣裳詠紀堂課吏惟寅嚴吏治愛民如子樹民章犬羊歸部風清塞騏驥呈材宿
耀房更喜崇墉歌比戶西滄億兆荷恩光

力持名教信非常七屬維新闢講堂考覈相期勤踐履品題豈第在詞章庇寒有厦爭懷杜勵志無荒冀

幕房從此蘭膏堪繼晷何須鑿壁夜分光

主善深慚屢失常情殷問字侍公堂發蒙從識金懸鑑羅宿非惟漢有章雕朽十年逢哲匠讀書百卷憶山房感公知遇蒙公德藜火常輝太乙光

祝恩學齋邑侯花甲

花縣偏逢絳縣人榴紅時節祝生申岡陵共上無疆頌詩酒能娛自在身紫蓋朱旛新氣象蒼顏白髮古精神仙翁自得長生術甲算綿延擬大椿

奉送晁耀南夫子之官錦江步元韻

函丈睽違十八春遠來謁見老成人堂開畫錦成佳會門植穠桃罕雜賓多士歛才歸槩範同閭切意式和親瘡痍更見殷懷抱濟世良方信有神

一室和風暫坐春南車指示執迷人心傳恪授詩兼禮文法詳論主與賓蜀道關山將遠別師生情意轉相親嘉陵此去多佳境不必升沉更問神

折梅曾寄隴頭春他日年華感故人桃李園中還作主芙蓉城裏又爲賓輝映棣萼關心遠路入潼華舉目親勝蹟終因佳咏在廬山面目句傳神

此去錦江別有春草堂重謁浣花人補治還作行冰吏坐理何須入幕賓往日黃封欣暢飲舊時赤子喜

相親上峯如問安民略答策董公筆入神

追祝子元汪公七十晉五遺行七律四首

騎箕一去海雲空景仰芳型感不窮
誼洽鄉鄰思往日身藏閩市有高風
君進酒筵方盛芳嶺會仙樂
未終今日瑤觴爭補祝還將福祿頌來崇

紅塵撒手已三年橘叟桐君結夙緣
沒後芳名誠丕著生前懿範固多賢
方遺世訓慈兼孝人仰楷模章
與弦更有一番仁濟物六宗三黨賴周全

靈樹一株仰大椿蒼松風度鶴精神
養生兼有謀生術在世還同出世人
身外榮華都掃去壺中日月更
番新從今不飲中山酒宴赴蓬瀛爲上賓

不尙浮華祇守真息心無異葛天民
花朝載酒常行樂芝室開筵每及春
繞膝芳蘭看崛起介眉蕃祉喜
重申蕪詞聊補岡陵頌一瓣椒香集衆賓

奉跋雲司馬命和湯孟生院長滄中未開白牡丹元韻並和唐桂齡明府倒押元韻七律三首

覷破朝華眼界空生來贏得雪成叢
觀音含笑珠林際妃子藏嬌玉圃中
無語暫教籠夜月忍寒祇是待
春風陋他芍藥爲君侍早放階前爛熳紅

不受塵埃半點紅春來亭畔見清風
冰姿尙歛芳菲節珠蕊還添醞釀中
根託精蟾移月窟香招粉蝶出

花叢始知淡極花偏豔一洗姚黃魏紫空
悟徹凡葩色卽空仙姿羞入綺羅叢手神秀出繁華外富貴遲來澹泊中玉結樓臺難舞雪紙裁簾幙尙
遮風飽餐朝露齊開後一點芳心映旭紅

贈秦仿麒兄七律

隨宦西行不計程三年兩度駐邊城汪洋氣概波千頃爽朗襟懷月一泓翦燭深宵天易曉廢書綺歲恨
難平望君加勵前修志大器從來晚始成
俗情擺脫度翩翩贊理琴堂客是仙遠信却將清夢驗離杯偏與故人牽從前樽酒尋同樂此後郵筒望
屢傳我豈江郎才亦盡巴歌多負彩雲箋

代張敬敷廣文贈秦仿麟赴省送別七律

石上三生締舊緣太原公子度翩翩品高不亞蘭台貴官好多資蓮幕賢濟美君惟稱跨竈論交我亦算
忘年靈椿留得甘棠愛喜報長途不次遷
玉關遷土已多年汾水風光向我傳御李何妨三日別班荆又結再來緣虛心應物人爲鑑肆口談天河
欲懸同是邊城羈旅客一回團聚一陶然

光緒辛巳季秋跋雲司馬以大集賜教捧讀之次率成七律用誌欽佩

轅宋轅唐體格新襟懷風雅本天真一枝彩筆開生面五夜青燈伴吟身玉律金科多著述模山範水見精神從今幸得龍門啟莫訝元亭問字頻

送秦仿麒由泰興晉省侍

尊人將之官酒泉

連朝歡聚爲分離聞賦驪歌神暗馳今夜何妨燈共翦明晨祇有僕相隨交深傾蓋終嫌晚風送歸舟莫逐遲料得前途光景好祖鞭早慰故人期

碾伯洛巴溝偶吟

一灣流水繞柴門始信深山別有村官稅征租無擾累此間便是小桃源
深山深處有人家綠柳依依夾桃花初夏日長無箇事碧陰携酒話桑麻
寒流繞戶淨紅埃山近雪光對面來莫怪人文多鵲起南山佳氣接蓬萊
傍山依水兩三村講讓興仁古道存躬稼之餘多樂事且將詩禮課兒孫

洛巴瞻拜祖墓

佳城鬱鬱在山岡馬馱牛眠久發祥昭穆從茲聯子姓論祠未得薦丁觴宗功祖德千秋賴瑤草琪花滿地香今日虔誠徒一拜愧無繼述表幽光

與洛巴族家合飲七古

樂都之南有深溝雪山崔巍河水流出山清如在山好終日嗚咽古渡頭我來適值清和辰綠柳依依近
水濱田原高下逢膏雨良苗茁茁盡懷新鬱鬱佳城在山麓到此令人感風木敬宗睦祖通殷勤展閱譜
牒敘昭穆脈絡分明派不差世代蕭山是舊家我亦後裔寓西滬操業祇種那侯瓜上年赴試來會面當
日舊族聯新眷恭敬桑梓我未能轉擾隆情開芳宴盤餐雜黍佐香醪連朝歡飲樂陶陶量狹難以效一
鼓空負高陽酒興豪

丁亥閏四月杪五峯寺紀游五古

昔日上五峯東道有賢主轉瞬廿八年久未到仙宇回首溯同遊哲人已作古策杖今又來良友會三五
小住息役勞霽景復新覩泉深或藏龍石怪如蹲虎陰洞星象寒陽崖椴檉聚琪花散芬芳林禽歌金縷
秀拔獨一峯巨靈運斤斧羣山蜿蜒來曲折不可數况值宿雨晴煙嵐翠欲吐蠟履訪白雲暫與麋鹿伍
澄花洗心胸臨流觴浮羽山阿笛一聲牛背橫牧豎絕頂貪尋幽夕陽啣林隄挑燈共談禪煮茗清肺腑
吁嗟乎山色亘古青對面增秀嫵人生不滿百碌碌徒自苦何日息塵鞅特向巖築戶未經我讀書一一
隨時補或吟白雪詞或將素琴撫習靜心自閒加餐力常勞行住此山巔小隱爲老圃

菩薩殿

隨喜到上方倚雲支床坐日暮一聲鐘萬古塵心破

玉皇殿

向曉海雲紅日照
通明殿司香舊有名
鶴立伸脊戀

三清閣

孤嶂飛鳥外危巖
一綫通有時雲霧裏
傑閣現虛空

龍神祠

龍宮踞石巔下有
清泉注平原幾處田
隨時得甘澍

北洞

峭壁不可攀捷經
無由取往來惟白雲
出岫作霖雨

老虎洞

古洞少人蹤高出
雲樹杪我欲結茅居
得免風塵擾

無量洞

巉巖挂女蘿石澄
披芳草稽顙告至尊
永將黎民保

澄華泉

雲樹森陰下花光
一片澗出山清亦湛
香冷勝于冰

隱泉

聞聲不見形甘隱與石共其中有蛟龍莫言潛勿用

冽泉

舉世欲澄清不作石中隱試取一杯嘗爽美潤喉吻

五峯飛瀑

未到澄華飲猶疑匹緣懸騰雲從此去潤澤遍山川

枕流亭遺址

細草碧如茵泉流淌清響坐此暫息機頓覺塵襟爽

寒泉精舍遺址

空階掩碧苔斜陽鴉雀噪清泉汲取便煑茗石爲竈

平頂山

畏途歷巉巖絕頂平如掌翹首望岱宗忽作凌雲想

讀楊松門觀察紀五峯寺碑文

碣存劫火餘文字尙完好名勝藉筆傳清辭奮蘭藻

贈李鶴年軍門

英姿颯爽本天成，猿背將軍舊有名。
露布聲威宣玉塞，監門歌頌滿金城。
雄懷久裕勤王略，壯志常存敵愾情。
河朔從今資半壁，將星終夜耀長庚。

八月十五夜翫月

連日寒生雨，今宵月滿城。
普天無霧靄，大地放光明。
瓜果家家宴，笙歌處處聲。
登樓頻四顧，庾亮有同情。

丁亥六月初八日偕游西元山

層巒疊嶂擁虛空，遙望渾疑無路通。
轉峯迴臨絕頂，此身飛去翠微中。
西山佳氣接空崗，何必更尋問道宮。
習靜我曾三日住，塵心滌去十分紅。
侵雲黛色夕陽西，雲樹參差路欲迷。
久坐山中誰砭俗，良禽時向耳邊囁。
水流石隙響潺湲，對此全將俗慮刪。
洗藥仙人何處去，尙留丹竈在人間。
古洞幽深石作門，仙人遺蹟在雲根。
琪花滿徑蒼苔厚，印我芒鞋第一痕。

題方元仲觀察秦劍拓本題詠

秦皇御宇弱善良，天下之兵聚咸陽。
銷鋒鑄鍊費籌度，金人十二列朝堂。
百練精鋼歲月深，不隨戈戟共銷沉。
芙蓉鏢淬霜花豔，當與千將作國琛。
何人揮霍策功勳，中郎將官秦護軍。
隴西姓氏獨推李，古篆兩

行細入筋蒼筤主人精賞鑑豐城寶物豈久淹價不能言萬戶輕市人漫道千金贖紫電分飛百道橫匣
吟龍虎暮雲平尙方莫作頑錐用從此天涯仗遠行

己卯鄉試蘭州旅舍偶吟

西風入戶冷清清一枕黃梁夢未成祇是逃名心不果又來茅店聽雞聲

謝陳月亭軍門贈牡丹

瓊枝久羨在瑤台客裏逢花眼便開四月連逢甘雨潤一枝先得好香來依窗不惜銀燒燭醉豔頻教玉
引杯我乏瓊瑤無以報聊吟拙句謝栽培

名花却少金壺貯辜負天香竟夜開正欲園林尋豔去何期富貴逼人來乞陰思護雲千朶酣飲先酬酒
一杯安置明窗勤愛惜落英莫使怨塵埃

重陽登樂都東城感懷

去歲登臨處今朝趁興來山川增暮色城郭淨塵埃爽氣迎花海閒情付酒杯極天憑眺望雁路向雲開
秋色近城早西風急暮砧河源來塞遠雪勢觀山深擇木棲鳴鳥投林宿倦禽昔賢何處去長憶采薇吟

仲冬暮登碾伯東城

日暮上城東蕭蕭起朔風河來千里外雪擁四山中斥埃無胡馬鄉書寄塞鴻歸來無箇事夜讀課諸童

春日雨後閒步西郊

遠水含沙夕照明綠楊處處有鶯鳴賞心膏雨連三日大麥青青小麥生

庚寅重陽前二日感懷吟菊

秋後寒香誰與尋能堅晚節是貞心亭亭獨向風前立不怕嚴霜每日侵

闕題

楊柳陰陰護短垣此間風景似桃源他年我得携家住天雨天晴不出門
翠山如畫繞西東一帶人家綠樹中我欲乘槎天際去長空寥闊起秋風

住久欠莫多番帳

中外嚴疆自此分牛羊下處日將曛杖藜試向前溪去踏破嶺頭幾處雲
韋韜牧馬自成羣買犢賣刀樂籽耘客到亦知通款洽烹茶煮酒意殷勤

秋日由丹噶爾城赴西寧

陰雨無情阻客程驅車破曉出山城莫愁前路無相識無數青山帶笑迎

庚寅重陽登高感懷

登高須上最高臺引興全資酒一杯宦轍京華增悵望文章後進費栽培龍頭無屬心猶壯馬齒雖加志

不灰路闢雲鵬誰與共佳音頻向耳邊催
人生幾醉菊花觴今又提壺上鳳凰景覽三川開倦眼時維九日費吟腸疎林半落風前葉兩鬢欲侵秋
後霜爲語黃花吾負汝東籬含笑爲誰香

立冬日吟佛手黃菊花

精華之氣稟金剛慣受西風慣傲霜晚節秀含三徑翠羣芳花遜九秋香冬來猶覺手神好老去偏享日
月長莫罷殘英輕棄擲菊囊攜帶勝萸囊

吟懷

無關思慮是良知體驗全憑平日時莫使此心如月望今宵更比昨宵虧
虛明無物是靈臺祇怕塵飛半點埃但得醍醐勤灌溉蕊珠不患不成胎

留別礪伯鳳山書院諸生

雲路代多名下十風塵我慚過來人皋比連歲徒虛擁辜負李桃因候新
讀書功用貴施爲身外功名不足奇賢達先憂能後樂存心原在秀才時
性道從來本大同入門須認主人翁先賢一語君牢記着實功夫在反躬
外人求道道無根宜向倫常溯大原堯舜施爲惟孝弟力行原不在多言

集杜少陵五言八韻

政簡移風速詩清立意新飛騰知有榮雄略動如神爛熳通經術光輝參席珍揚鑣隨日馭聽履上星辰
徒倚瞻王室從容靜塞塵乘威滅蠹蠹驚代得麒麟鄭氏才振古楮公書絕倫餘波期救涸一起轍中鱗

集杜少陵五言四韻二首

訓諭青衿子興含滄浪清行行樹佳政肅肅有異聲慘淡風雲會飛騰戰伐名氛埃期必掃容易卽前程
青雲動高興走馬向承明塞上得國寶軍中吹玉笙開懷慰枯槁戮力掃機槍公若登台輔豈惟偃甲兵

游強氏園

日午炎方盛尋芳到小園引風香滿袖款客酒盈罇窗綠松常罩階紅藥正翻愛花天意重不肯到黃昏

祝安小峰太史外舅敬軒鄧公七古

秦山迤邐隴水曲里井敦龐無薄俗得其秀者尤嶽奇成章追琢相金玉髻俊蜚聲標雅望策名宜在青
雲上只緣鹽米誤儒冠猗頓懷才肯虛曠牙籌會計竟能量負米超超蜀漢長詩補華陔仲潔養還將遠
道體高堂千金到手須分散惠及宗支並姻串愛親愛姊因愛甥廢書不讀伊誰患阿士能文舒異狀果
爲外家成宅相高科榮誥總尋常毋墜清名招厚謗我聞此訓思典型祝畢誰邀眼獨青歡承槃簞樂書
史會看陰德大門庭自古仁人必上壽經冬松柏逾滋茂中山旨酒祝長生適值一陽來復候

吟雲

覆庇周天下從龍妙有爲終教作霖雨祇是出山遲

癸巳六月北上供職告別兄弟椿亭墨農

一說別離淚欲吞多言握手轉忘言耕耘事業關衣食詩禮方嚴教子孫戚黨隨時常顧視行途無恙莫心煩酬知得遂平居志歸里仍將姜被溫

白墩子贈別張靜菴

前程深恐祖生經連日奔馳馬未停千行里送終有別勞君跋涉到邊亭
情意殷殷戀舊知遠來載酒慰相思厚餽餽糧多旨美免我前途苦叫飢
負物生駝向後行中途忽報失遺驚往返深宵三十里難君歸去到天明
匆匆臨別盡餘言囑我莫加內顧煩近來交接多炎附慷慨惟公古道存

草地口占

出門纔一月苦況有千端解渴泉多瀟充飢餅已乾晝行炎日熱夜宿曉風寒欲把中懷訴胡兒解語難

馬蓮湖失路

沙堆四擁少人行鴻爪模糊認不清前面程途原咫尺盤旋一夜到天明

誤走沙窩似轉輪前途何處問迷津多情祇有天邊月不減清輝照遠人

賀蘭山

泉湧平原龍效靈匡廬何處覓真形此間遙向雲中望數點晴嵐天外青

賀蘭山道中

朔方邊要舊稱雄白草黃沙一望中築塞頻煩籌畫力受降終恃戰征功山靈雲護常依北河勢支分遠
繞東牧馬自今稱盛事羽書無事望飛鴻

瀚海茫茫欲問津一番閱歷一番新遠馳荒徼三千里結伴梵僧四十人汲取清泉還易飲沙鋪原野不
飛塵天涯何幸逢知己鑑賞又締文字因

駙馬府城遇王肇修上庠

印之紀靖遠人

風塵勞擾處何幸遇同鄉鶴髮精神古龍文論辨詳異方爲上客高弟有賢王杯酒勞相慰徒增感慨長
俄博

善單寺

絕少人煙處王公地界分良禽飛不到胡馬自成羣失路泉難覓無田草孰耘京華何日至捷足欲凌雲
千里無人塞草黃高原平處起僧房飛簷邃宇多周折金碧輝煌七寶裝

怒馬奔騰聲若雷
金鏡法鼓響高臺
滿途原不分男女
躡足爭看活佛來
佛座明燈燦若星
珠聯瓔珞錦爲屏
一聲經偈纔宣講
大衆低頭側耳聽
唵哩嚩囉語欠真
珊瑚珠寶各紛陳
一齊爭向階前跪
祇恐呵聲不及身

敦都公路

聖武收酋長清平
二百秋不庸開戍堡
何事建邊樓日漸
皇風被人成大義
求衣冠遵漢制垣
堞鄙秦謀塞遠書
傳雁時清劍買牛
運河多粟米採幹
斷松楸雪有鴻飛
印途無鼠竊憂節
旌蘇武苦碑避李
陵留匹馬長征久
良禽上苑投會同
如珥筆睿鑒及荒
陬

善單寺起程東十五里住宿夜半大風

誰激風伯怒夜半
忽逞強暴戾如鯨
吼奔騰勝虎狂山
川俱震動沙石亂
飛揚卷舒雲盡黑
暗淡月無光馬鳴
聲不斷聞之心悲
傷行人苦露宿遇
變甚恐惶危坐不
成寐百慮亦全忘
起敬回天怒應律
發清商

阿挪拖道中

原野蕭條極無林
鳥不棲河來幽冀
北雪繞大荒西烹
茗燒牛糞尋途認
馬蹏遙瞻千里外
平地與天齊

塞上秋風

碧梧纔落葉塞外
草全黃一目西風
緊偏增北地涼胡
笳多感慨天籟助
清商遇順鴻飛去
佳音報故鄉

巴彥井地

不見人煙處遙聞犬吠聲探途欣得水無警不須兵天籟隨秋發宵征伴月行暫投今夜宿明日訪前程

塞上雜吟

畫地分中外天時自不同伏庚逢暑日當午起寒風草出沙間白花無樹上紅胡兒皆好武坐鎮賴三公
豈惟天道異人事亦全殊不識三餘樂難期五教敷安身須彘幕晤面敬烟壺牛馬資生產羣成不賦租
歸化承天運資生少土宜回春難產黍向日不聞葵石積無源水途留沒字碑餽糧行旅缺黃米可爲炊
俗習誇馳馬豪華羨海西五山常逐兔千里不聞雞餐飯多黃米燒柴徧綠堤孳生皆壯盛帳外草萋萋
河勢由南下人居北塞中無豺羊在牧逐牝馬嘶風粟缺難留豕天寒不到鴻陋風還守古行事復蒙蒙
男女皆尊佛牟尼信手拈行途無馬店少賄尙雞廉乳食難離肉香茶亦用鹽一聞該幹至爭欲布施添
何處安家室韋講曠野居俗惟誇富裕業不事耕畝行葬多需火終年罕見蔬客來留款待不說食無餘
塞俗思詳述深慙筆未工荒途多曠日鄙俗待移風馬較庚郵易鱗難乙字通壯遊來異域雪印祇留鴻

塞上秋夜憶書院諸生

餞飲東郊別離懷北塞榮詩書親五載燈火憶三更勉効農曹職空餘講席情文星今夜朗鑒戰望羣英

敦都公

風聲早已被流沙不分中外爲一家住牧敦都無別事秋風塞上聽胡笳

自善單寺起身連日陰雲欲雨幸到敦都次日大雨如注達宵

攬轡連朝賦載駸西風吹散塞雲深蒼天也解行人苦待到敦都始作霖

敦都公招飲

函關封盡一丸泥蕃部星羅接海西當日奇謀空用武今時上爵祇頒圭恩承北闕多酬馬浪定南隄永靖觥美酒羔羊留客處一輪新月照玻璃

八月十二夜初晴見月

冷霧沉沉四面遮秋聲蕭瑟雨聲加盼晴多借西風力吹散陰雲放月華

早發敦都道中

嚴霜凜凜五更寒塞上殘星立馬看疊嶂千層雲四面不知何處是長安

中秋節從敦都起程行二十里住夜月甚明

出門看月尋常事詎料偏從塞上看萬景激清雲盡散一輪圓滿衆爭觀天地空闊輝普照古往今來光不殘幾處停琴望霄漢誰家吹笛倚樓欄中天懸影同千里佳節離懷集百端溼桂露華露毳幕維桑風味憶杯盤帳帷半夜開雙蠹主僕三人坐一團燃燭何欣花結彩剖瓜還喜內流丹行途無酒樽空設入

座多光主不寒今夕虛邀誠草率明年讌賞再行歡

中秋後二日僂爾羣洛道中風雪交加冷甚河溝結冰

甫過中秋節河流已結冰寒風催霰集冷霧向雲騰塞草黃全隕霜華白早凝長途行不易履薄益兢兢

贈敦都輔國公

連日開樽酒不空平原待士禮儀隆傾心每欲寒暄叙居處殊方語欠通
輕程又起趁雲開百里超超祖帳來屈指五紋添弱線好將樽酒話金臺

永安寺幼僧

北邊風尙多修寺無數兒童慣出家遷地何能如大願提超苦海到中華

善單寺沿途供支馬匹皆馴良

遠塞三千里超超不易行沿途多馬圈借遞達鵬程躡捷蹶輕快馴良眼不生乘來皆遇順況有好風迎

早發汪岡腦爾

曠野雞聲少盈途犬肆狂疎星明北極殘月出東方山暗雲開曙秋深露結霜宵行三十里旭日發紅光

贈四子王

餞別離公府東行又謁王天威宣虎幄袞服煥龍章誓帶君恩重封茅世澤長靖邊偉略著奕載永留芳

部落重重布全資坐鎮雄庄坳多牧馬集宅息飛鴻舊有膏腴地新勤糶糴功今年逢大有人物喜滋豐
四子部落道中

率土歸持載誰言地不毛界分燕國險關據雁門豪霜逼清秋老風寒永夜號家鄉何處是西望首頻搔
駝困人疲倦迢遙道路長草深埋馬跡軌曲繞羊腸穿壑雲千疊懷人水一方歇鞍逢日暮人夢待黃梁
漸入人煙境邊亭景不同犁田農叱犢戲水字排鴻循軌無歧路型仁有古風更欣逢墨士講究六書工
不日深山出平原土脈和遠峯晴滴翠逝水靜無波秋暮天時暖春回地利多燕臺翹首望懷古發高歌

重陽前三日在霍蘭達憶家鄉

秋暮西山爽氣開同人共醉菊花杯佳辰往日重陽近料理榼樽登鳳臺

霍蘭達夜大雨

西風陣陣掃塵埃雲晴四山吹不開節過重陽時已暮雨聲連夜送秋來

重陽日憶渥中諸同人

佳節欣逢落帽辰開樽共賞菊花新鳳凰臺上登高處應念天涯行路人

重陽日感懷

昨夜風聲兼雨聲重陽天氣半陰晴幾回能向東籬醉孤負黃花又遠行

塞上約計秋闈揭曉憶書院諸生

志士勤蛾術文光照鳳臺觀摩酬素願恩宴許追陪科分雖前定芳名費暗猜京都通線報齒錄必先來
重陽後二日途中遇雪

每慮霖霖虐何期雪驟來行人勞跋涉中道費徘徊曠野寒難禦狂風暴肆災下帷圍火坐學字撥殘灰

察哈爾道中雜吟

王邸公衙門盡開爭迎生佛坐蓮臺供餐多用牛羊肉我亦隨緣托鉢來
到處銀牌火速催駱駝匹馬選良材轉移行李誠便捷結駟還誇塞上來
行脚許多皆用駝帳房羅鍋一齊馱番兒乘輿揚鞭去駿馬奔騰不及佗
大風吹起雪飄揚禦冷無方苦備嘗幾輩窮人衣少絮相隨塞外飽冰霜

張家口道中

離家三月整三天遠歷朔方路四千東口今宵欣報到一輪明月又將圓

察哈爾頭站軍台

匹馬關山月征人興倍豪王公皆致敬跋涉莫辭勞鄉信渙中寄文名塞外高此行殊不負塞俗助吟毫

關溝

對峙雙峯峻中流一綫通草猶含雨綠樹徧染霜紅集市車塵遠依巖屋勢崇山明兼水秀人在畫圖中
張家口

山向城邊抱人從塞外來灌田河引水開路石成堆中外分疆界豐盈廣貨財明辰南口去攬勝到金臺
宣化府

寇邊無故敢疑猜每苦虜從天外來一經神武元符握終使蠻夷驕志灰懷遠至今遊化日安危自古仗
奇才當年突騎縱橫處殖穀務農無草萊

居庸關

塞雲游漫布山岑征人到此感難禁扼要祇知兵太薄蒙塵何苦駕親臨犒軍誰恤金錢竭大難終教土
木深守國無須誇設險恩威相結衆歸心

九月二十晚宿德勝門外東皇寺

京都一別十年餘挾策重來舊識疏何幸又逢方外友啟關久待故人車

住甘肅試館

昨宵曾宿東皇寺今夜安居會館中近壁起爐爲煮茗量窗裁紙禁通風室虛塵少疑生白燭燄花生徧
映紅塞上行蹤誰與訴芝蘭近座接香風

癸巳十二月十四日乾清宮引見在召見翰詹後

衆職趨朝各有班幸隨鸚鵡覲天顏微臣未得涓埃報此去從公敢自寬

追憶先大夫往訓

熒熒燈火夜分時勞苦休辭爲課兒鉄硯代磨勤校字金錢不惜遠延師春風未及芹香采秋雨遽摧椿
蔭移簡編猶有丹鉛在手澤如新不忍披

教誨隨時有義方彌留遺訓語尤詳安貧勿爲豬肝累勵學還期燕翼長事業不同須務正功名若就莫
爭強言猶在耳情無極夙夜銘心何敢忘

京都吟懷

前途事事總茫然努力枉爭祖逖鞭得失原來天早定科名漫說我無緣郎官白首成何用志士青燈已
有年冠蓋往來徒鹿鹿不如鉄硯作良田

山川悠遠據征鞍辛苦不辭爲一官鴻羽纔通千里信羊裘莫禦五更寒時非當可休爭勝學不如人敢
自寬行篋尙存經史子客居無事且詳觀

連茹何事叶征戈十載官階一旦拋報國未酬心上願離鄉屢罄囊中肴鴻無遠志同凡鳥龍隱潢池等
小蛟何日遂初纔得志結廬山厂好編茅

接家書得悉四胞弟病逝

離家日久盼佳音一紙書來痛裂心鶴署猶期官早入雁行詎意影先沈觀光志尙功名重學篆書翻金石深每向西風空灑淚鵠原不忍句終吟

天寒怎比我心寒提起同胞淚不乾送別旗亭時未幾從官并省意何安文字從前燈下正形容此後夢中看憑闌幾欲抒哀思無奈關山路杳漫

需次太原長夏述懷

莫向人前冠欲彈改官容易做官難讀書幾繼明條律作吏先賢戒素餐三字有箴須盡職一夫不獲敢求安伐柯惟我還無斧惕厲時時撫寸丹

先正新書手自披精言惟冀我愚醫學非經世才何濟壯不如人老可知眷口還無妻孥累傷心祇爲故親悲憂懷耿耿難成寐排解時資酒一卮

魚雁傳書往復回轉教鄉思起徘徊征衣久被秋風破節署欣逢夏屋開施教因材暫學陋栽花覓地待春來除書縱使知名早蒲質何能勝楚才

庭院陰濃草木深影上紗窗綠欲侵室少飛塵虛白映紙鋪淨几硬黃臨消愁時用茶爲酒解熱偏逢雨作霖燕翼每思經過險夢中猶畏穀沈沈

歲華多半負春光
去年來同鹿忙
出塞未曾悲失馬
補牢還自悔亡羊
一生歡喜千杯酒
半世功名兩鬢霜
今日并州纔駐足
轅門聽鼓免倉皇

龍章自晉回家口占

履夷常作履危觀
險雖逢路自寬
此去家鄉應早到
卽差黃耳報平安

甲午立秋日七律四首

一年容易又秋風
疎蓼花光滿眼紅
百事無成憐我拙
四時佳興與誰同
遠鳴徒仰雲中鶴
逸響惟聞海上鴻
久欲栽花難得地
轅門聽鼓夕陽中

一年容易又秋風
雨後樓臺夕照紅
鄉信迢遙秦晉隔
詩人感慨古今同
藏山有霧身如豹
揮手無絃日送鴻
柳綠花紅窗四面
牀帷如在畫圖中

一年容易又秋風
獨坐小窗燈影紅
近水何欣來月早
和光不必與塵同
簷牙高敞依新雁
雪爪迢遙憶舊鴻
今夕蘭闥多乞巧
深情盡在不言中

一年容易又秋風
轉眼楓林葉染紅
雲歛煙霏天氣靜
稻肥粱熟土宜同
宦情羞逐奔泉驥
野性還追戲水鴻
幸有知心常聚晤
一天風雨笑談中

秋夜

入戶涼風起階前葉亂飛雨餘陰氣重雲際月華微撲燄蛾忘倦授巢燕已歸聞雞猶不寐默默檢前非
甲午中元日吟懷

萬寶已告成志士復何有歲月任蹉跎焉能宏抱負去年值今朝沙蹟正奔走倏忽星一周秋風動疎柳
自與先塋違縈懷常翹首佳節逢中元時享欠清酒鬱鬱望松楸攝衣上高阜迢迢天一方烟樹隔隴右
人生固須臾青年易白叟松柏有貞姿凡木豈同朽隨時愛景光無失天所受倦鳥早歸林勿爲弋者誘
持竿到西河問雨來南畝逸曲尋瑤琴游心窺二酉兒孫課青燈情話悅親友禦冬種晚菘冒雨翦春韭
長此養餘年有時酌大斗

籠中翠鳥

託跡在山林素有鴻鵠志一朝歸樊籠暫將弋者避人言樊籠苦固非逍遙地我謂樊籠好休息凌霄翅
黃梁並清流朝夕供飲餽色舉倫逢時振翻任所主抖擻倦眼開羽毛愈顯翠或向玉樹棲或爲青鳥使
或上千仞翔飛鳴出人意薄暮投舊巢梅林慰遐思

憶朝陽山莊 四言

蘇木河邊土樓山下五畝之間一棲能借爰處爰居無虞無詐燈火常親諷吟未罷虎榜書名鸞坡增價
郎署長辭斧柯思假宦海多波官場可怕欲同其車速返我舍閭里得親軒冕永謝心篆留香牙籤滿架

祇藏鳩愚不羨鶴跨敬畏聖言期宣教化伏臘歲時斗酒虔貫妻子一堂翁和慰藉和風當春綠陰入夏會友攜觴秉燭遊夜祈養天年願了婚嫁優哉游哉樂此閒暇

山右撫署西偏書館垂楊二株陰濃可愛

任爾山涯與水濱
亭亭獨作畫堂春
芳姿綽約偏宜雨
秀色嫵娜不塵塵
籜幹常依松柏翠
成陰豈讓李桃新
柔絲一縷風前舞
別緒多牽羈旅人

庭前嘉樹問誰栽
樹久無言立蒼苔
地僻却無官馬繫
杖高欣有早鶯來
十年宜見丰神秀
九夏多蒙雨露培
綠葉陰濃炎暑日
樓臺皆向午晴開

取材宏用比華桐
根託莎廳更不同
滋潤先迎官道水
吹噓遠接上林風
碧陰濃罩紗窗外
翠靄低垂畫檻中
榻下華堂書可讀
綠煙深處夜燈紅

桃符換罷日遲遲
最愛垂楊早挂絲
庭院偏增花韻豔
年華每逐樹陰移
西風奮發還能舞
寒雨飄零不見衰
我里千株多手植
長條最繫遠人思

暑夜書館柳下納涼

炎威當午火雲流
入夜風涼暑氣收
庭院深深塵不到
月輪初上柳梢頭

吟夢所遇

綠楊低處最高臺臺上渠成水溯洄水落崖前如匹練飛身直下此間來

自嘲

習慣山林自在身何能常作宦遊人抽簪如遂歸兮願愛惜門前楊柳春

苦熱

火日炎炎近午天澡身何處覓溫泉躁煩能解良方在靜坐薄團老學禪

吟懷

日月雙丸轉循環不少停兇民深惕厲爾室凜雷霆誼氣高雲漢仁慈守典型習勤朝運甃浴德日遵銘
爭羨功勳峻非關筆硯靈一夫常繫念萬事莫勞形憂樂關天下修爲在戶庭惜分吾有素得寸質慚冥
所遇非嘉會徒勞對大廷一心誠草草兩鬢已星星望爾敦行子因時勉習丁課虛求室白繼晷伴燈青
常帶留窗草鋤經愛奠砌山淵窺秘奧磨礪發新硯羽翼隨鸞鳳光輝小燭螢勗哉崇令德奕世著芳馨

中秋撫署翫月

玉宇無塵夜氣清長天萬里盡光明絃歌處處開新宴瓜果家家常笑聲去年曾見蟾華好舉杯對影敦
都道匆匆過隙駒馳綠樹重陰又剝棗京都一去彩帆收聽鼓并州賦宦遊佳節屢逢生別感鄉思遙
在海西頭况值桂華秋皎潔一輪香滿冰如澈舉家見月念行人令使情懷腸欲結今宵月是前宵月今

歲人非舊歲人世事茫茫多變態清輝誰是月常新主人有酒歡今夕金餅銀盤陳綺席傾談渾忘刻漏長條教玉兔過山脊君不見乘輿南樓持海螯坐據胡牀爽氣高又不見詠史西江寄託深牛渚泛月契素心露落霜催人易老芳名不朽發文藻雙塔聲音細昔賢逸情慕仰商山皓人間碧海總成幻今朝又送汾河雁浮生行樂須及時莫使月華驚轉盼

憶沙磧

京華辭別歎征驄黃葉秋風又一年部落迢遞敦都道葡萄美酒憶開筵黃河奔流向潼關未見分曲到胡天五穀不生地氣冷黃沙白草少人烟韋韞幕遙相望羊牛無數夕陽邊男子腰間跨寶劍婦女頭戴珠翠鈿胭脂馬珊瑚鞭相與馳驅過市廛笳聲吹出清平曲犬牙相錯高枕眠可知柔遠招徠意中外不分一心聯吁嗟乎秦皇漢武設險以爲固成堡長城遠結連民勞財匱終無濟贖武窮兵空取愆何如深仁厚澤彌綸乎垓埏不動干戈不用要結而獻雉貢葵喁然向化者之恐後而爭先

感懷

無限淒清感非關不平鳴吟懷唐樂府秋色晉陽城見雁思鄉信征蠻動戍兵從戎皆仗策我獨愧班生教學原相長偷閒愈我愚詩書關吏治謹飭見廉隅開卷燒殘燭當歌缺唾壺至言宏取用修業仰先儒願學持竿子而今得未曾青氍藏我拙紫綬讓人能絃外尋餘韻書中訪舊朋近來塵俗少心跡共秋澗

幕府清嚴地朱楹隔市闌楊依松蔭近人共菊花閒金殿欣重到銅章未易頒一官仍繫足何日返家山

吟菊

點綴三秋色黃花結伴稀精英天特授節操晚生暉炎日羞趨熱嚴霜不怕威知音彭澤令無怪款松扉
慣受金風冷偏逢玉露滋含香偏覺淡摘豔不嫌遲晚節流芳處重陽冒雨時蝶蜂隨處鬧却少到東籬
不是嚴霜妒焉知冷豔貞疎籬含晚秀傲骨本天生供養詩兼酒手神淡以清託根休說薄益壽勝金莖
因見秋花好風光憶故鄉誰酬千日酒又負一年香寫照拈新韻懷芳立夕陽晚來須保護歸里醉瑤觴

秋梁公

國事當艱厄精明獨擅能薦賢爲宰相唐室賴中興

唐槐

得地盤根固陰遮路幾又李唐無寸土古木尙開花

乙未四月在并州聞湟中風鶴之驚有檄來告援

憂國心如擣家鄉賊困城柳營雖禦侮草野不聊生淵藪多餘孽嚴疆少重兵羽書頻告警何日斬鯨鯨

乙未奉委解甘軍餉

干戈遽爾起西邊蛇走山原虎嘯川委解糈餼銀十萬冒行艱險路三千病連同事誰攜手車抵長安始

釋肩烽火連天西塞遠危途利往仗龍泉

調赴狄道前敵路經內官營

滿地烽煙起民人盡逃生哀鳴鴻徧野竊據鼠憑城有卵巢全覆成功草孰橫我生何不遇兩次見刀兵

雨後登平番縣青龍山

宿雨清溫塵衆山翠如滴青龍在城東閒將丹梯覓紫館與丹臺處處都步履降有神明生成多嘉績
蘋藻伸薦享永將福祉錫烽火自鄉關罷征少鋒鏑謝眺多游人詩酒信無敵籌筆我疎慵著鞭讓祖述
蠟屐趁新晴幽情叩清寂挈伴兩三人栖踪倚峭壁放眼豁胸襟煩囂全蕩滌結子草木香芬芳信手摘
爽氣挹西山安得常對觀日夕起涼颺炎熱歛火焱歸途緩緩行因風聽牧笛

七月七日同張子繁甘登仁壽山

奇峯突兀矗晴空石佛低頭拜下風渺渺輿圖相貫注黃河青海列西東莊浪幾經鯨鯨竄長蛇侵擾及
仙觀金碧雖災面目眞菁英不逐浮雲散妖氛掃盡雲霄迴西山挺秀無纓溟探藥道童去未還山凹祇
見存丹鼎運斤鞭石到青岑結構精嚴見匠心法界莊嚴新氣象輸他勝地盡黃金壯麗爭詡神工巧香
篆得供羅漢飽來往游人如蟻行蒼苔處處留鴻爪名山惟我傾心久戎馬奔馳如無暇走佳日欣逢青
鳥來知心約會携紅友百八石梯連步上塵襟未洗挹清爽絕頂高踞眼界開形形色色都歸掌此間本

是游觀地法象顯傳清淨意鷗柑砭俗聽其便莫教縱恣干神忌身心蠲潔表真誠歲序惟修祀事明白爾仁能宏拯濟年豐人壽頌承平

同日偕張子繁甘又游香爐山

策蹇纔登叩山籌又來崇嶺叩仙關椒香一瓣伸心願柏酒三人開笑顏翠嶂高低資嘯傲丹梯上下費追攀愧無謝眺驚人句辜負晴嵐遠岫環

笑語恍從天際聞此峯高峻又超羣岑樓繚繞凌松棟石證峻嶒鋪蘚紋烏嶺馬牙供眺覽琪花瑤草競芳芬鍊丹道士歸何處多半山門鎖白雲

四望狼煙已息烽螺鬢積雨翠重重崖懸不礙神仙府洞古應藏虎豹蹤飛閣三層開眼界行雲千里豁心胸游觀不覺牛羊下探奧尋奇興轉濃

川原遠近暮烟平映水光餘夕照明携酒幾回來勝地看山今日遇新晴飛鴻逸響留泥印牧馬長嘶動客情歸到河干回首望磨鍼閣外晚霞橫

葛衣翁祠

建文皇帝出蒙塵慷慨從亡多老臣塞馬先生期報主雪菴甘作比邱身補鍋空空憑妙手雲門相伴在先後樵夫慣受路風霜滇黔巴蜀徧行走更有老人身壯健趨炎附熱非吾願葛衣一襲度春秋行乞市

中常困頓河西邊地絕同羣熱血滿腔五內焚泣罷成吟吟更泣悲歌酸語不忍聞留都不是有官來誰
識故知在草萊相顧未能通一語匿形避影上崔嵬數年牧豎病將亡囑付主人漫治喪乾淨欲尋無寸
土風隨西北好飛揚吁嗟乎遜國諸臣心性烈成仁取義標清節隨亡翁乃抱孤忠一朝奄化芳蹤滅祠
樓高矗繪真容秋菊春蘭祀事恭莫道姓名不傳世千秋尙說魯家備

丁酉夏登平番城感懷

一上高城一悵然枝陽風景異當年咏懷難罄滄桑感倦眼懶看雲樹煙斥堠烽纔銷曠野耕耘功半廢
良田目前多少艱難事宏濟惟求冠世賢

河伯無端肆虐威舊時城郭已全非龍潭混濁鯨頻起驛路荒涼鳥不飛陌上徧開花灼灼河邊賸有柳
依依目中形勝青龍近樓閣參差映夕暉

玉關西去路悠悠保障金城建戍樓投筆功名誇定遠屯田勳績重封侯使來西域球頻貢源覓黃河槎
遠浮自愧儒冠迂拙子參謀殊乏幄中籌

軍中無事屢憑欄滿目瘡痍不忍看滄陔從今思樂土將軍何日解征鞍陳費圖空監門議邀賞羞彈貢
禹冠爲問時艱誰共濟登高遠囑發長歎

雪後

一白浩然處田原杳莫分有人樓上望遠思正紛紛風樹不留雪石山多凍雲衡門鳥雀靜木杪露斜曛
壬辰初秋游五峯

一自松門仗節行五峯始得有仙名山源蕩漾泉隨湧石洞嶙峋路不平苔厚祗緣人跡少林深時聞鳥
聲清此間安得常相住靜養天年樂太平

雨後平番登青龍山藥王閣

外外青山淡有痕一聲清磬度晨昏棲幽此處堪容膝天雨天晴不出門

丁酉暮秋赴平番大營路徑碾伯同人招飲鳳山

破曉微雨洗塵埃紅檻碧窗面面開夕照倚欄同醉處千山萬壑眼前來

賀定郡伯伯六旬雙壽

花甲添籌永林壬祝嘏度瓜盤增粉席蓉鏡做金天自應文場試頻隨仕路選國書新鈇畫家訓舊青氈
東魯觀旂盛西曹掌筆專御屏題姓氏郎署秩班聯疑仗經言決才儲史冊編檔房勞握印律館慎關鍵
按部能平獄還朝尙備員虎符頒闕下鷲序振洲前撫字瘡痍療催科擾累捐蠹胥清弊寶蛇夢驚沉淵
異族鋤萌動齋匪剪蔓延練軍門列戟化俗戶歌弦牘奏頭銜耀旌揚意旨宜豸衣披赫赫翠羽戴翩翩
服忽更魚佩裝初返鶴船棠陰遺召舍柏墓續歌阡再出燕山岫兼管渭水泉載途迎竹馬挂壁歇蒲鞭

慈蔭宏涵蓋仁風暢代扇鱗臚皆露積雉陌徧雲連絲繡官眞佛香焚吏亦仙野方權蟾飲庭轉馳鶉懸
圖匱謀難緩防饑策必先法師朱子社義比范公田粟腐何多也苗枯竟倏然噉鴻孤瀆岸涸耐滿秦川
推食施鍾釜傾囊助粥饘禦災須饜減救因爲租蠲赤壤消威日蒼穹格篆烟霖甘資喜洽賜亢息憂煎
巷合神明頌碑宜德政鏤留黃原有屬借寇奈無緣隴右屯兵壯湟中守郡賢祀忠祠復地恤故俸分錢
礦採容陶百渠通潤耦千丹廳搜鼠竄白塔鞠牛牽沙蹟區三等城垣保萬全循聲寬御衆懋績靜安邊
帝簡調梅品農謳膏黍篇槎輕來北斗孤朗映南纏鳳管鸞笙隊冰桃雪藕筵銀河星共吉碧殿月長圓
命賜龍綸貴輝分翟芾鮮兒看縈桂籍孫報茁桐絲果獻瑤池畔藜扶雪嶺巔賀堂羅燕雀會座集貂蟬
福祉膺箕範勳名記刻箋願偕稱兕侶眉壽介椿年

長安故宮行

晉陽撥亂生眞主新開天策秦王府首取關中作帝都二十英年混區宇再傳妖孽便披猖鸚鵡騰天變
鳳凰不是當朝象相國周家天下不歸唐廬陵夫婦悲窮蹙天日重覩恣卿慾殿上纔聞黜五王宮中已
報嬴雙陸河南王子氣桓桓仗義鋤奸宗社安新主黃袍方御座斜封墨勅又除官乾坤再造眞龍起都
道開元好天子武功文德致昇平姚宋裴王媿媿美可憐天寶市朝非宰相專權帝澤微仗馬不言教舞
馬梅妃失寵進楊妃秋風七夕長生殿他生密約重歡熾虢國香車錦繡堆胡奴甲第櫻桃醺漁陽烽火

遍驪山羅襪香囊葬玉環一路傷心悼妃子鳥啼花落劍門關汾陽忠義臨淮勇百戰摧鋒出關隴太子
非貪袞冕尊上皇自念家山重兩京收復至尊回萬里成都法駕來行到故宮思往事綺羅珠翠盡成灰
中宮更有張良姊七寶鞍催建寧死黃臺瓜苦誦新辭白衣山人淚如水一朝柔弱累朝輕赫赫天威令
不行凶橫逆豎傳心去跋扈強藩接踵生建中初政貞觀樣轉瞬辜負時清望當年錯任赤心胡此日專
憑藍面相釀成禍亂寇紛紛又見朝廷起陣雲無雙學士中興詔第一功名定難軍元和神武龍顏怒不
用庸奴用裴度河朔歸心淮燕平金丹奪命成朝露從此唐家遂漸衰南牙消息北司窺白面激成甘露
變青袍貶死去華悲鴟張逆燄青天晦固蒂深根誇擁戴國老門生事可哀家奴赧獻言猶在堪笑官家
事事差羣奄不逐逐朱邪杏林春宴無名字金甲秋風咏菊花路蛇押虎當朝坐不到蒙塵羞悔過蜀道
重驚翠輦臨都城三見金甌破沙陀雄毅好軍容奮起撐天獨眼龍赦詔九重傳北蹟義旗十萬指西雍
河東老去英風息眼視燕梁愁滅國雄心只說剪羣凶大勢誰知歸老賊冬郎去後逆溫猖苦逼全家赴
汴梁青燐九曲荒池血白馬三更古驛霜美人夜半倉皇問雪色刀光明似鏡椒殿殘棋一局終朱三苦
索君妃命興亡成敗總天心滄海桑田自古今千年華表歸來鶴一曲雍門泣下琴龍樓鳳闕空鱗樓千
門萬戶餘荒堞內人玉腕葬鴛鴦富女羅裙化蝴蝶我來憑弔故唐宮衰草斜陽一片紅凝碧荒池都寂
寞沉香亭古尙玲瓏年年秋雁汾河岸江山滿目歌聲斷綺閣臺城逝水空雀台瑩苑浮雲散蟋蟀西風

夜露溫閒花滿地澹秋痕灞橋楊柳長安月杜宇聲聲欲斷魂

枕上

夜長不能寂撫劍起悲歌酒味愁中淡詩情枕上多青年懷懊惱白日負蹉跎窗外有明月其如離恨何

野坐

山入邊城不肯平岡巒起伏勢崢嶸烟凝瓦屋寒無色風起郊原夜有聲慈母倚閨應悵望舊交懸榻倍
關情人生身世無窮恨未到中年涕已橫

暮春游香水園

己未

獨到名園日已斜登遊處處最堪嗟池空夜雨添流水門鎖春風掃落花寂寞樓臺藏野鼠蕭條庭樹集
山鴉由來興廢都如此且倚欄杆醉晚霞

光緒乙亥秋日登察漢城觀青海

荷戈來塞外薄暮上孤城海接青天立山連白霧平番童衝雲牧野馬嘯風鳴一片秋煙起遙聞去雁聲

客中思家

他鄉雖樂土何事久勾留梓重縈新夢虫吟動客愁綠波牛脊水紅樹鳳林秋畢竟家山好歸心望去舟

客中感懷

歷盡風霜白髮新老來光景最傷神少年座上羞論齒文字場中每讓人自料無才甘守拙誰能有術可
醫貧消愁只借雲林筆畫出春山萬疊春

題翠鳥棲海棠

夜深紅燭尙高燒夢醒西廊春晝遙好鳥一聲花欲語安排美酒換金貂

上豫欽差老師七律四章

九重特簡命平成十萬番夷拜下風雲擁黃河朝節使山環青海紀邊功軍中舊說韓安國塞上今來郭
代公遙指轅門排畫戟牙旗先映夕陽紅

才兼文武位公卿天下衡文又典兵關內新開都護府渥中高築受降城三巴絳節澄虛鑑五郡清標仰
盛名莫怪淮陽遲來詔安西還仗趙營平

字字珍珠墨未乾清詞麗句滿齊紈情深仙佛前生業功在河湟後世賢守道不如傳道好讀書容易著
書難東山五十才爲相天下於今望謝安

已將勳業畫麒麟載道歡聲尙部民萬里遠來觀偉績八年前已謁清塵聽談秦隴機宜事知是朝廷倚
重人一代文章經與濟先生不愧古名臣

紀夢二首 調臨江仙

記得垂楊深院裏。粧成倦倚高樓。風吹弱絮上簾鉤。飄零傷薄命。痴望惹閒愁。暮雨朝雲終是幻。黑甜鄉裏溫柔。幾番欲去更勾留。贈卿金抹額。報我玉搔頭。詎料清晨開倦眼。蕭齋旅況淒清。口中猶記喚卿卿。痴心同化蝶。好夢怨啼鶯。粉唾脂香頻檢點。青衫狼籍分明。自思自笑太憨生。花難逢解語。儂已誤多情。

馬霄石

中華民國二十六年八月

基生蘭 捐貲重印

王育德

I 222.7

4